

OMENALDIAK ETA SORGINKERIAK

Aurten omenaldi bi eskiñi daustez. Obeto esanda iru, baiña itxi basterrean irugarrena. Lenakoak esaten ebena: irugarrenean jo dau emen lurra.

Ni ez naz asiko omenaldirik merezi ete neban edo ez barriro eztabaidatzen. Onelako gauzetan edozelako erantzunak, salduta itxi leikie bat bitsez eta aparrez, edo ta ipokresi eta eskar txarrez.

Orretan sartu barik, bitarteko gertaerak esatera nator gaur.

Orrelakoetan, gonbidatzeko agiriak eta abar bialtzen dira. Jakiña, ori ez da gizarteko artu-emonen alderdi bat baiño.

Idazki, tarjeta eta abar txukun egin nai izaten dira. Baiña askotan, sorgiñak oraindik bizi diran lez, sorginkeriak gertaten dira irarkoletan.

Etxean daukat Aldundiak agindutako nire omenaldirako tarjetak zelan urten eben irarkolatik.

Au esaten eban: "euskeraren alde egin^ako lan merita-garriagaitik". Konturatzen? Eginiako eginrfakoren orde.

Ni ez nua esaten egin^ako esaera ori guzurtia izango zanik, baiña zelan bustartu egin^akoa meritagariagaz?

Orra askotan berba batek, obeto esanda izki bakar batek, zelako nastea sortu leiken.

Beste bat. /fomenaldira gonbidatzen zaituzte adeitsuki, esaten eban. Norbaitek esku leunagaz zoriondu nai izan nindun eta //orreri orrazia sartu eutsan eta or galdu zan.

Izan be Aorek aidean garabiz danok. Batzuk ten eta besteak bultz. Eta ba dirudi gu, kalean gabiltzanok, libreago bizi gareala. Baiña "barruan" gorputz eta arima sartuta dabiltzanak?

Orreiri, itxuraz, geiegizko pekatuak ez dautse kezkarik emoten. Or konpon. Gitxieigizko utsak geiago lotsatuko lituzkela dirudi.

Au idazten nagon egunotan "Deia"n, Jaurilaritzan euskera arloan txapela darabillan bateri, onelako geiegizko batek laban egin dautso: /fastero bide hori egiten. Erderazko semana *aste* ez da ba eta ez *hastel*

Zorionez iztegitara begiratzeko zentzu pixka bat askok daukagu. Berbak zer adierazi nai, alako esan naikoa aurkitu eta emoten alegintzen gara. Baiña, oraintsu, etxe bateko seigarren oiñari buruz, au idatzita ikusi neban: seigarren landarea. Nunbai "sexta planta" euskeratzera iztegitara joan, eta an planta nai eta bedarki lez landare ipini, dana

bat dalakoan, seigarren landarea idatzi eta gaiñera etxe barruko igogaillua artzean, seigarren "landara"ra joango zan nasai eta zabal.

Beste au lez. Euskeraz "manzana de casas" erderazkoa etxadi esanagaz ondo datorke. Baiña idazki baten au be irakurri izan dot: etxe sagarra.

Eta orrelakoak dira gure umiak, errietako umiak euskerarik ez dakiela eta lotsatuten alegintzen diranak. Orrelakoak zenbat? Otzarakadak batzeko aiña.

Guazen omenaldira, aririk eten barik.

Erritar askoren irudimenean zer adierazoten ete dau omenaldi batek?

Aldundikoa egin eta andik egunetara adiskide bat urreratu jatan. Jakiña da gure errian, Kultur Etxearen ardurapean, Ondarroa izeneko urtekaria ataraten asi giñala. Aurten bostgarren urtea. Lagun orrek kezkatu itandu eustan: Zeiñek atara al izango dau aurten Ondarroa aldizkaria?

Esatea lez, zu omendu zaitue ta ez daukazu orretan sartzetik. Edo ta ondarrutarrak esaten dakigun lez, kosteria amaitu dozu. Orain atsedean eta lo.

Bigarren omenaldia Labayrukoak eskiñi eusten Derio'n.

Egun larria euki neban. Etenda nenguan osasunetik. Goizalde larria eta eguerdian be kezkatu nenguan, joan al izango ete nitzan be nire artean zalantzatuten nebala.

Derio'ra eldu eta izerdi otzetan. Adiskide batek ikusi ta... gaixo zagoz? Kolore txarra daukazu. Eta esan bein eta barriro be. Adorea emoten, itxuraz.

A igaro zan eta nun diñosten gabean Frantze'ko Tour'eko etapa irabazi nebala. Kontxo! Bermeorako bidean ete nabil ba?

Ze gertatu zan?

Euskal Telebistak, Derioko omenaldiari buruz nigaz jardunaldia agertu baiño len, Tour'eko etapa irabazi ebanaren goramenak esaten ebillala, nire argazkia ipinita euki eban atzekaldean. Orra ba ni, ia beste omenaldi bat egiteko puntuak irabazten, zaartu ondoren, ia bastoiaren laguntza bear dogunetan, kaltza txikiak jantzi eta errubera biko txirindulan etapak be irabazteko gai. Eta ain zuzen aspaldikdik egunik argalena euki neban egunean, txirindulariak lez "pajara" sartuta euki neban egunean!

Sorginkeririk ez dagola?

AUGUSTIN ZUBIKARAI.